

BOSNA I HERCEGOVINA  
FEDERACIJA BOSNE I HERCEGOVINE  
TUZLANSKI KANTON  
OPĆINSKI SUD U TUZLI  
Broj: 32 0 St 411038 21 St  
Tuzla, 01.06.2022.godine

Općinski sud u Tuzli, stečajni sudija Antonela Đaković, u stečajnom postupku nad imovinom dužnika **"HN HENEX" d.o.o. za proizvodnju, trgovinu i usluge Banovići u stečaju, Podgorje, Mušići bb**, dana 01.06.2022.godine, donio je sljedeće:

## **R J E Š E N J E**

**ZAKLJUČUJE SE stečajni postupak** nad imovinom dužnika "HN HENEX" d.o.o. za proizvodnju, trgovinu i usluge Banovići u stečaju, Podgorje, Mušići bb, zbog nedovoljnosti stečajne mase.

Rješenje o zaključenju stečajnog postupka objavit će se u "Službenim novinama FBiH" i na oglasnoj ploči ovog suda.

Po pravosnažnosti ovog rješenja isto će se dostaviti Odjeljenju registra privrednih subjekata Općinskog suda u Tuzli, radi brisanja stečajnog dužnika iz sudskog registra.

Obavještavaju se stečajni dužnik i stečajni upravnik da pravne posljedice zaključenja stečajnog postupka nastupaju 8 dana nakon objavljivanja ovog rješenja u „Službenim novinama FBiH“.

## **O b r a z l o ž e n j e**

Rješenjem ovog suda, broj gornji, od 19.01.2022.godine otvoren je stečajni postupak nad imovinom dužnika "HN HENEX" d.o.o. za proizvodnju, trgovinu i usluge Banovići u stečaju, Podgorje, Mušići bb, a stečajnog upravnika imenovan je Emir Nuhanović iz Živinica.

U toku stečajnog postupka prijave potraživanja podnijeli su povjerioci Porezna uprava FBiH, Kantonalni porezni ured Tuzla i Porezna ispostava Banovići, te Uprava za indirektno oporezivanje BiH, Regionalni centar Tuzla.

Prije održavanja ispitnog i izvještajnog ročišta stečajni upravnik dostavio je u spis suda popis prijavljenih potraživanja, koji je objavljen na oglasnoj ploči i pisarnici suda, kao i Izvještaj o ekonomsko- finansijskom stanju stečajnog dužnika.

Na ispitnom ročištu održanom dana 26.04.2022.godine ispitane su prijave potraživanja povjerilaca, te su priznata potraživanja povjerilaca u ukupnom iznosu od 84.679,08 KM, kao potraživanja općeg isplatnog reda. Nakon ispitnog ročišta održano je izvještajno ročište na kojem je stečajni upravnik podnio izvještaj o provedenom postupku i izvještaj o ekonomskom stanju stečajnog dužnika. Iz izvještaja je utvrđeno da dužnik ne raspolaže imovinom koja bi predstavljala stečajnu masu, a troškovi stečajnog postupka su pokriveni uplaćenim predujmom od strane predlagača.

Na osnovu odredbe člana 197. Zakona o stečaju FBiH, stečajni upravnik je, imajući u vidu da nema stečajne mase iz koje bi se namirila bar djelimično prijavljena i priznata potraživanja, dana 26.04.2022.godine prijavio da postoji nedovoljnost stečajne mase.

Sud je rješenjem od 28.04.2022.godine, a koje je objavljeno u "Službenim novinama FBiH" broj: 37/22 od 18.05.2022.godine, javno objavio prijavu nedovoljnosti stečajne mase, a na osnovu odredbe člana 197 stav 3. Zakona o stečaju FBiH (Službene novine broj: 53/2021).

Odredbom člana 200. stav 1. Zakona o stečaju propisano je da stečajni sudija zaključuje stečajni postupak čim je stečajni upravnik izvršio diobu stečajne mase, u skladu sa članom 198. ovog zakona, a stavom 2. istog člana je propisano da je stečajni upravnik dužan za svoj rad, nakon prijavljivanja nedovoljnosti stečajne mase, posebno da položi račun stečajnom sudiji. Pored navedenog odredbom člana 200. stav 3. istog Zakona propisano je da ako se nakon zaključenja stečajnog postupka pronađu predmeti koji pripadaju stečajnoj masi, stečajni sudija će na prijedlog stečajnog upravnika, povjerioca stečajne mase ili po službenoj dužnosti odrediti naknadnu diobu. U ovom slučaju se na odgovarajući način primjenjuju odredbe člana 192. stav 3, i člana 193 i 194 ovog Zakona.

*Obzirom da stečajni dužnik nema imovine čijim bi se unovčavanjem namirila potraživanja povjerilaca, osim za pokriće troškova stečajnog postupka, to je sud shodno odredbi člana 200. Zakona o stečaju zaključio stečajni postupak i odlučio kao u izreci rješenja.*

Prema odredbi člana 204. stav 1. Zakona o stečaju (Službene novine FBiH broj: 53/2021) rješenje o zaključenju stečajnog postupka objavljuje se u „Službenim novinama FBiH“ i oglasnoj ploči suda.

Pravne posljedice zaključenja stečajnog postupka nastupaju 8 dana nakon objavljivanja ovog rješenja u „Službenim novinama FBiH“, a sve shodno članu 204. stav 3. Zakona o stečaju FBiH.

Odluka o brisanju pravnog lica iz javnih registara zasnovana je na odredbi člana 204. stav 5. Zakona o stečaju FBiH.

**Stečajni sudija,  
Antonela Đaković**

**POUKA:** Protiv ovog rješenja stečajni povjerioci i stečajni dužnik mogu izjaviti žalbu Kantonalnom sudu u Tuzli, putem ovog suda, u roku od 8 (osam) dana, od dana objave rješenja u „Službenim novinama FBiH“.